

**ZAVOD ZA PLANIRANJE RAZVOJA
KANTONA SARAJEVO**

P R A V I L N I K
O POSTUPKU DIREKTOG SPORAZUMA

Sarajevo, oktobar/listopad 2019. godine

Na osnovu člana 20. Zakona o državnoj službi u Kantonu Sarajevo („Službene novine KS“ br. 31/16), čl. 22. i 23. Zakona o organizaciji i djelokrugu organa uprave i upravnih organizacija Kantona Sarajevo („Službene novine Kantona Sarajevo“ – prečišćeni tekst, broj 02/12), člana 90. Zakona o javnim nabavkama (“Službeni glasnik BiH” broj: 39/14), Pravilnika o postupku direktnog sporazuma (“Službeni glasnik BiH” broj: 90/14), i Uredbe o kontroli javnih nabavki u svim institucijama čiji je osnivač Kanton Sarajevo („Službene novine Kantona Sarajevo“, br. 27/19), Direktor Zavoda za planiranje razvoja Kantona Sarajevo, donosi

P R A V I L N I K

O POSTUPKU DIREKTOG SPORAZUMA

I Predmet Pravilnika

Član 1.

(1) Ovim Pravilnikom definira se postupak javne nabavke roba, usluga i radova putem direktnog sporazuma iz člana 90. Zakona o javnim nabavkama (u daljem tekstu: Zakon), te se implementiraju odredbe Uredbe o kontroli javnih nabavki u svim institucijama čiji je osnivač Kanton Sarajevo (u daljem tekstu: Uredba), u kojem Zavod za planiranje razvoja Kantona Sarajevo (u daljem tekstu: Zavod), kao Ugovorni organ, prikuplja prijedloge cijena ili ponude od pojedinačnog dobavljača, davaoca usluga ili izvođača radova (u daljem tekstu: ponuđač) i pregovara ili prihvata cijenu kao uslov za konačan sporazum.

II Uslovi za primjenu direktnog sporazuma

Član 2.

(1) Postupak direktnog sporazuma se može provesti kada je procijenjena vrijednost istovrsnih roba, usluga ili radova na godišnjem nivou jednaka ili manja od 6.000,00 KM.

(2) Zavod može tokom jedne godine za isti predmet nabavke potrošiti do 6.000,00 KM putem ovog postupka.

(3) Zavod može započeti postupak direktnog sporazuma ako je takva nabavka predviđena planom nabavki ili kada direktor Zavoda donese posebnu odluku o pokretanju direktnog sporazuma u skladu s članom 17. stav (1) Zakona.

III Principi dodjele direktnog sporazuma

Član 3.

Postupak direktnog sporazuma se provodi na način da se osigura poštivanje principa iz člana 3. Zakona, tj. da se prema ponuđačima ponaša transparentno, jednako i nediskriminirajuće, na način da se osigura pravična i aktivna konkurencija s ciljem najefikasnijeg korištenja javnih sredstava u vezi s predmetom nabavke i njegovom svrhom.

IV Početak postupka

Član 4.

(1) Procjenjivanje vrijednosti javne nabavke koja se dodjeljuje direktnim sporazumom vrši se u skladu s članom 15. Zakona. (Procijenjena vrijednost nabavke robe, usluge ili radova jednaka je novčanom iznosu koji Zavod plaća bez obračunatog poreza na dodatnu vrijednost.)

(2) Procijenjena vrijednost mora biti važeća u trenutku kada Zavod zatraži prijedlog cijene ili ponudu od jednog ili više privrednih subjekata.

(3) Postupak direktnog sporazuma započinje donošenjem odluke u pisanom obliku i sadrži sve elemente iz člana 18. stav (1) Zakona:

- a) zakonski osnov za provođenje postupka javne nabavke,
- b) predmet javne nabavke,
- c) procijenjenu vrijednost javne nabavke,

- d) podatke o izvoru - načinu finansiranja,
- e) vrstu postupka javne nabavke.

V Izvršenje postupka

Član 5.

- (1) Zavod ispituje tržište, rukovodeći se pri tome čl. 11., 12. i 13. Uredbe, te traži pisani prijedlog cijene ili ponudu od jednog ili više privrednih subjekata koji obavljaju djelatnost koja je predmet javne nabavke.
- (2) Nakon što primi prijedlog cijene ili ponudu od jednog ili više ponuđača, a prije zaključivanja direktnog sporazuma Zavod:
 - a) pregovara sa ponuđačem/ponuđačima o cijeni i/ili
 - b) prihvata prijedlog cijene ili ponudu jednog ponuđača i/ili
 - c) provodi drugu vrstu postupka definisanu Zakonom.

VI Izbor ponuđača

Član 6.

- (1) Kod izbora ponude na osnovu koje će biti dodijeljen ugovor, Zavod treba uzeti u obzir faktore kao što su cijena, količina, kvalitet, tehnički opis, estetske i funkcionalne zahtjeve, karakteristike koje se odnose na okolinu, vrijeme i period isporuke i sl.
- (2) Zavod bira ponuđača na način koji garantira najbolju razmjenu vrijednosti za novac. Kada vodi pregovore koji se odnose na prijedlog cijene ili ponudu, Zavod djeluje u skladu sa dobrom komercijalnom praksom.
- (3) Kada traži prijedlog cijene ili ponudu, Zavod daje ponuđačima određeni rok da pripreme prijedlog cijene ili ponudu, uzimajući u obzir kompleksnost nabave.

VII Zaključivanje direktnog sporazuma

Član 7.

Direktni sporazum smatra se zaključenim:

- a) Kod nabavki čija vrijednost iznosi do 1.000,00 KM, prilaganjem računa ili druge odgovarajuće dokumentacije;
- b) Kod nabavki čija vrijednost je viša od 1.000,00 KM, Zavod je dužan zaključiti ugovor.

VIII Prijelazne i završne odredbe

Član 8.

Stupanjem na snagu ovog pravilnika prestaje primjena Pravilnika o postupku direktnog sporazuma broj 08-49-1568/15 od 16. marta 2015. godine.

IX Stupanje na snagu

Član 9.

Ovaj Pravilnik stupa na snagu danom donošenja, a primjenjivat će se od 01.01.2020. godine. Bit će objavljen na web-strani i na oglasnoj ploči Zavoda za planiranje razvoja Kantona Sarajevo.



Direktor

Hamdija Efendić, dipl.ing.građ.

Broj: 08-49-4689/19

Sarajevo, 09. oktobar 2019. godine